



ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ
ՇՆՈՐՀԱՎՈՐԱԿԱՆ ԳԻՐԸ ՓՐԿՉԻ ՀՐԱՇԱՓԱՌ ԵՎ ՍՈՒՐԲ
ՀԱՐՈՒԹՅԱՆ ՏՈՆԻ ԱՌԹԻՎ՝ ՈՒՂՂՎԱԾ ՀԱՅԱՍՏԱՆՅԱՅՑ
ԵԿԵՂԵՑՈՒ ՆՎԻՐԱՊԵՏԱԿԱՆ ԵՐԵՔ ԱԹՈՌՆԵՐԻՆ,
ԹԵՄԱԿԱԼ ԲՈԼՈՐ ԱՌԱՋՆՈՐԴՆԵՐԻՆ ԵՎ ԵԿԵՂԵՑԱԿԱՆ
ՀԱՄԱՅՆՔՆԵՐԻՆ

«Քրիստոս յարեալ ի մեռելոց»:

Սուրբ Հարության ավետիսով, ուրախ ենք ձեզ ողջունելու և հարուցյալ Փրկչի Իջման սուրբ սեղանից հղելու երկնառաք օրհնություն տիրախնամ Աթոռիդ եկեղեցիներին, բարեջան հոգևոր սպասավորներին և համայն Մեր հավատացյալ զավակներին, Մեր սրտից բխած ամենաջերմ մաղթանքներով հանդերձ:

Սուրբ Հարության շնորհները թող առատապես բաշխվեն համայն մեր հավատացյալ ժողովրդին ի շինություն հոգևոր կյանքի, համրապնդումն մեր Մայր եկեղեցու միության և ի կենսագործումն ձեր կրոնական, մշակութային և բարեսիրական աստվածահաճո իղձերի:

Հարուցյալ Տիրոջ շնորհներով թող լուսավորվեն մանավանդ աշխարհը համայն ու ժողովուրդները բոլոր, գտնելու համար իրավ ճանապարհը խաղաղ ու արդար գոյակցության և համերաշխ գործակցության:

«Խաղաղություն ընդ եղբարս. և շնորհք ընդ ամենեսին ոյք սիրեն զՏէր մեր Յիսուս Քրիստոս անկեղծությամբ» (Եփես. Զ 23—24), ամեն:

Եղբայրական սիրով ի Քրիստոս՝

Վ Ա Զ Գ Ե Ն Ա

ԾԱՅՐԱԳՈՒՅՆ ՊԵՏՐԻԱՐԷ ԵՎ ԿԱԹՈՂԻԿՈՍ

ԱՄԵՆԱՅՆ ՀԱՅՈՑ

*
* * *

Փրկչի հրաշափառ և սուրբ Հարության տոնի առթիվ Ամենայն Հայոց Հայրապետի անունով ստացվեցին ամենաջերմ և հարգալից զգացմունքներով զեղուն բազմաթիվ շնորհավորական հեռագրեր և նամակներ մեր նվիրապետական երեք Աթոռների զահակալներից, արտասահմանի և ներքին մեր բոլոր թեմերի առաջնորդներից, ազգային-եկեղեցական, մշակութային, հայրենակցական, տիկնանց, օրհորդաց և երիտասարդաց զանազան կազմակերպություններից, հայ և օտար պաշտոնական անձնավորություններից:

